



# Impomeisan baut sapot po English langus wea ol Queensland steit skul

English as an additional language or dialect (EAL/D), i bin gad nada neim bipo, English as a Second Language (ESL). Em i spesil eria blo ediukeisan wea i tokbaut tise English po dem student uda no spik Standard Australian English po pas langus blo dempla.

## EAL/D lerna wea Queensland

EAL/D lerna spik nada langus dipren prom English ane dempla nid sapot wea da English langus po elpe dempla andastan dat pat blo da skul wok dempla spostu sabe.

No ebri lerna uda spik nada langus i EAL/D lerna, bikos mait dempla gad gud sabe blo English solong dempla ken meke gud wok wanem dempla spostu mekem wea da skul.

Dem EAL/D lerna maitbi demwan uda bin bon wea Australia ane bin gro wea pamle wea ol no bin spik English wea da aus. Dem langus maitbi ol dipren Aboriginal o Torres Strait Langus, o pikinini uda bin kam prom nada kantri. Dempla student uda bin bon wea nada kantri maitbi people uda bin kam prom kantri wea i bin gad big problem, maitbi student prom nada kantri, o pipol uda bin suzem po kam po stap wea Australia.

## Paindaut dem EAL/D lerna uda go nid sapot

Dem skul go paindaut dem EAL/D lerna wen dempla stat wea skul o wen dempla stadi wea dem klas rum.

Wen dem pikinini i go stat wea da skul, dem tisa go paindaut olkain impomeisan baut aumas sabe dem pikinini i gad wea da pas langus blo dem student. Prom diskain dem tisa go paindaut streitwei dat sam student i go bi EAL/D lerna.

Dempla mait paindaut dat sam dem nada student i go bi EAL/D lerna mata prom da wei dempla stadi o prom da langus dempla yuzem wea da klas rum. Dem klas rum tisa go paindaut uda i EAL/D lerna wen dempla tekenotis wiskain dem student akt wea da klas rum, prom wiskain skul wok dempla mekem, dem ansa blo test, raiting blo dempla, ane wen dempla sidaun tok po dem student.

## Sapot po EAL/D lerna

EAL/D lerna go nid spesil wei po tise dempla po elpe dempla po gede gud sabe blo English langus. Diswan go elpe dempla meke wok insaid wea da klas rum and dem skul go gibe spesil sapot po wanem dem student i nidem. Dem tisa go paindaut wiskain sabe dem student i gad wea English langus bikoz dempla go yuze da [Bandscales State Schools \(Queensland\)](#), ane go tise dem pikinini wanem dempla go nidem po gede gud sabe blo English dempla go nidem wea da klas rum.

Da skul go disaid baut aumas sapot em go gibem po dem EAL/D student. Diswan i go bi prom aumas sabe da student i gad blo English wen em lisen po English, po spik ane rid ane rait English ane demting baut skul.

EAL/D student i go lern da [Australian Curriculum](#) po eiz blo dempla ane dem tisa go yuze olkain dipren wei po kese intrest blo dem EAL/D lerna ane dempla go elpe dem lerna po gede gud sabe baut wanem dempla i spostu lernem.

## Test ane Ripot

EAL/D lerna go lern wanem dempla spostu lernem wea da skul, da seim taim dempla go lerne English. Po paindaut ip dem EAL/D lerna sabe dem tising wanem ol bin gedem, dem tisa go gibe dempla skul wok po mekem lo dem eria wanem dempla spostu sabe. Ip dem EAL/D lerna i gad problem wea da sabe dempla gad lo English, dem tisa go slo daun aumas English dem student i lern. Diswan go laue dem student po soe da sabe dempla gad wea dem nada spesil eria blo skul wok dempla bin spostu lernem. Em ken bi diskain. Dem EAL/D lerna wen ol stat po sabe English i ken soem wiskain sabe dempla gad baut skul wok, bai gede dempla po meke drawing, meke piksa, akt o prom tok.

Dem student go gede test ane ripot ane dem tisa go sekap diswan gens dem skul mak wanem dempla spostu gedem po da yia lebel wanem dempla spostu bin lernem. Bat, ip dem EAL/D lerna wea da pas yia blo stadi wea Australia, dempla mait no gede testing ane ripot. Po diskain student, dem ripot blo dempla baut da sabe dempla gad lo English i go raitem daun and sekem gense da [Bandscales State Schools \(Queensland\)](#), ane aumas gud wok dempla bin mekem wea dem eria blo da [Australian Curriculum](#) ip datwan da prapa ting po mekem.